

Chumi avang chuan
tupawh Kristaa
a awm chuan
thil siam thar a lo ni a;
thil huite chu a ral ta a;
ngaiteh u, a lo
thar ta.
2 Kor. 5:17

KRISTIAN THALAI

February
2014



Kristian Thalal Pâwl Chanchinbu thla tin chhuak

Vol IV No. 12



January ni 6 - 9, 2014 khan Choir Conductor training
pein Ellir Owen Graffiths leh Rev. Zolawma,
Wales aṭangin an lo kal



Conductors' training-a lo kalte leh CKTP hruaitute



Khawpui chung bial zaipawl conductor-te nen

Kristian Țhalai Pawl chanchinbu thla tin chhuak

1970-a chhuah Țan ■ Kum 44-naa wawi 2-na ■ Chhuah tawh zat : 425

Editor :

R. Lalhmingthanga

Joint Editors :

Upa Lalhruaizela
Pu Lalmanpuia Hrahsel
T. Upa Lalremsiama
T. UpaDr. H.Lalthanzara

Manager :

Lalmanpuia

A lak man :

Kum khatah - Rs. 60.00
Copy khat - Rs. 5.00

*Thu chhuah t̄ur nei chuan
Editor, Kristian Țhalai, Synod
Office-ah thawn t̄ur a ni a; a la
duh chuan KȚP Office-ah a man
p̄k l̄awk a ngai.*

Office Phone : 2326372/2335821

**E-mail : kristianthalai@yahoo.com
centralktp@gmail.com**

Visit us :

**cktp.blogspot.com
www.facebook.com/centralktp**

KRISTIAN ȚHALAI PAWL

Thupui

Rawngbawl t̄ura chhandam

Thupui inngahna

Ephesi 2:10 Thil Ța ti at̄an Krista
Isuaah chuan siama awmin, ama
kutchhuak kan ni si a, chu thil Ța ti
chu kan awmna t̄urin Pathianin a
buatsaih l̄awk a ni.

Thil tumte

1. Isua Krista rinna leh amah anna
kawnga Țhalaita hruai.
2. Kohhran kut ke ni tura Țhalaita
buatsaih.
3. Kohhran hnathawh tihpuitlin.
4. Krista Chanchin Ța puan darh.

A CHHUNGA THU AWM

- | | |
|--|----|
| 1. KȚP General Conference chungchanga hriattirna | 2 |
| 2. Rawngbawlna hlen | 4 |
| 3. Tho la êng rawh | 7 |
| 4. Itanagar khawpuiah Krismas | 9 |
| 5. Harsatna | 12 |
| 6. Țhalaita leh kum thar | 17 |
| 7. Hnathawh | 19 |

Editorial	1	Hringlang tl̄ang.....	23
Rim̄awi	26	Kantu	28
Keimahni.....	29-32		



KṚP General Conference

KṚP General Conference Vawi 55-na a lo thleng leh dawn ta reng mai, a thlengtute inbuatsaihna leh inpekna a ropui ṭhin hle. Pathian fak, chawimawi leh thu pawimawh tak tak ngaihtuah a ṭhalaite intawhkhawmna hun, hun pawimawh tak mai hi thil naranah leh palzam mai mai turah kan ngai ang tih a hlauhawm hle. Bial leh Branch KṚP-a hruaitu chinte phei chuan General Conference hi kan ngaih pawimawh a ṭul hle, hruaitu General Conference pawh la kal ve miah lo, kal tumna pawh nei lem lo awm ve theih a ni a, KṚP member kan nih theih chhung hun tawi teah hian General Conference hi i ngai pawimawh leh zual ang u, heng hun ṭhaah hian tel ve ngai lo ni lovin tel ve ziah i ni tawh zawk ang u. KṚP-te rawngbawl zel dan tur leh branch leh biala kan seng luh tur thil ṭha tam tak zir chhuahna atana hman ṭangkai theih a ni a; tin, thlarau lam ruai kil theihna hun ṭha tak mai a lo ni bawk nen, KṚP member zawng zawngte hian kan inkhawmpuite hi kan ngaih pawimawha, kan hlut thiam a ṭul leh zual. Mahni hlimna leh lawmna leh tuina lama nasa taka inpe mi tam tak kan hmu ṭhin, keini erawh Rawngbawl tura Chhandam kan ni tih hre rengin, rawngbawlna kawnga hma kan sawn zel theih nan, hautak mah se, buaithlak mah se, chān ngai mah se, kan mawhphurhna rawngbawlhna hi i hlen zel ang u. Kan member-te zingah KṚP General Conference awmzia hre ziktluak lo pawh an awm thei, a awmzia, kan thlir dan tur, kan telna tur a nih thu te, Inkhawmpui rorel thuchhuak ngaih pawimawh a ṭulzia te uar takin sawi zel ila, hma kan sawn theihna tur thil tam tak hmuchhuak tur leh ral do thei tura kan inthuum famkim theih nan Pathian hnenah ṭawngṭaiin KṚP General Conference hi i hlan zel ang u. ♦

**KṚP GENERAL CONFERENCE
CHUNGCHANGA HRIATTIRNA**

**RECEPTION COUNTER RUAHMAN TAWH - SIAM REM
LEH DAN**

1. Counter No. 2. Pu Hranglawta tual, Lungvar venga thleng tura ruahman - Dawrpui Vengthar bial chu - Counter No. 8, BSNL peng kawnah Zaingen Venga thleng tura ruahman Hnahthial bial nen inthlak thleng a ni.
Tichuan - Counter No. 2-ah Hnahthial bial an thleng ang a.
Counter No. 8-ah Dawrpui Vengthar an thleng ang.
2. Bangalore KṚP chu Counter No. 17. Pu H. Lianzuala tual, Vengtharah dah a ni.
3. Taiwan thalaite thlenna atan Horticulture Conference Centre ruahman a ni a. Hei hi, Counter No. 13, Canteen kawm, Dinthar Veng huam chhunga awm a ni.

PALAITHE HNENA NGENNA

KṚP General Conference vawi 55-na, February 27 - 2 March, 2014 Khawzawlin kan thlen turah palai a tam thei ang ber lo kal turin KṚP member-te kan beisei che u a.

KṚP General Conference vawi 55-na, Reception Sub-Committee chuan palai lo kalte chu, mahni chhungkhat lainate leh hmehhriat te pan lova, Reception Sub-Committee ruahmanna anga mahni thlennna tura ruat palai hmuahna counter pan zel turin kan ngen che u a ni. Bial leh Branch KṚP hruaitute pawhin hei hi min ngaih pawimawhsak hram turin kan beisei a ni.

Palaite lo dawnsawn chungchangah awlsamna leh zangkhaina a thlen theihna tur leh, rual khai taka Palaite kan thlen theihna tura ruahmanna kan siam hi min zawmsak hram turin palai lo kal tur zawng zawngte kan ngen che u a ni. Tluang taka in lo thlen theihna turin duhsakna sang ber kan hlan che u a. Inkhawmpui hlawhtling tak kan neih theih ngeina turin Pathian hnenah hnenah i ṭawngṭai zel ang u.


SAITHANGPUI SAILO

Secretary

Reception Sub-Committee

KṚP General Conference vawi 55-na: Khawzawlin

Not to scale



Note: January issue-a Bial hrang hrang thlenna tur kan rawn tarlan nen khan lo enmil ila, kan bial thlenna tur (vel) chu a hriat their awm e.

Rawngbawlina hlen

— Rev. C. Vanlalhruaia

Ran thupui hi Tirhkoh Paula'n Timothea, Pastor naupang zawk hnenah, a thuchah hnukung pawimawh tak mai chu amah fuih chakna ni fawma a ziaak a ni a. He lehkhathawn Paula'n a ziaak lai hian thenkhat chuan tan inah a la awm ni awmin an ngai a; mahse Eusebius-a chuan Rom tan in chhuahsana Spain ram lama Chanchin Tha te pawh hrilin, chumi hnu rei vak lovah martara thi ta angin a sawi.

Paula hian intihsiakna tha chu bei zo tawha, hlana awm mekin a insawi a, a hun tawp thleng mai dawna a hriat avangin he thu ropui tak hi Timothea hnenah a chah a ni.

He lehkhathawn hi mi mal hnena thawn ang tak pawhin a ngaih theih a; amaherawhchu, pastoral Ephistles (Pastor lehkhathawn), Kohhranho hnenah Kohhrante enkawl nana a chah a ni an ti.

Kan thupuih "Rawngbawlina hlen" tih a nih kha, rawng-

bawlina hlen tih awmzia hi kawng hnihin han chhui ilang.

1. 'Rawngbawlina hlen' tih hian, Paula'n amah khan Pathianin tih tur a pek zawng zawng chu ti zo tawha, bak nei tawh lo niin a inhria a. Chutiang chuan, tih tur zawng zawng tih zawh vek, vanram luh a kawka a. Timothea chu khaihlak awm hlek lo, tih hmaih awm miah lova khawvela a rawngbawlina chu ti zova, rinawm taka hlen chhuak turin a chah a ni.

2. 'Rawngbawlina hlen' tihin a kawh theih dang leh chu, Pathian leh kohhranhovin chanpual min pek a nih tur ang taka luah khah, tihhlawhtlin hi a ni. William Barclay-a chuan, "Tih tur kan neih apiang tih zawh zel hi rawngbawlina hlen a ni," a ti. Kohhrana kan hna chanpual te, chanvo kan neih ang angte a nih tur ang takin kan luah khat em? Keimahni theuh i inen chiang ang u.

Rawngbawlina hlen loh hi a awl hle mai. Hlen loh theih dan

chi hrang hrang a awm. Kan Bible-a mi pathumte i lo la chhuak teh ang.

1. Dema: Dema hi Paula rawngbawlpui, a rin pawl tak niin a lang. A lung in tan lai pawhin chibai bukna a thawn a ni. Mahse, khawvel a ngainat avangin Paula a kalsan a, a rawngbawl na a kalsan bak Paula'n a chungchanga sawi zui miah ta lo. Khawvel sum leh pai te, mi neih ang neih chak vena te avangin kan rawngbawl hna hi kan kalsan ve palh ang e.

Ka awm tawhna hmun pakhatat chuan High School aṅanga Pastor nih tum mi thiam thei tak, a ṅhiante pawhin 'Pastor' tia an koh mai chu, a chhungten hna dang thawk turin an tih luih tlat avangin sum hlawkna hmunah a tal lut a, zu leh sa a lo chen ta mai a, a chhungte avangin nun hlimna nei lovin khawvel a hmang ta. Rawngbawl na hlen loh chuan khawvelah hlimna a awm lo vang.

2. Nikola: Nikola hi Tirhkohte Thiltih bung 6-a Thlarau Thianghlima khat ṅhalh mi 7 an thlan zinga mi kha a ni. Nimahsela, Pathian thu leh milem biakna a sehmeah a, a inang tlanga ngaiin a sawi rem a, Pathian thutak a kal pensan

a, Thupuanah chuan a zirtirna zawmtute Lal Isuan a dem thu kan hmu. Paulan Timothea lehkha a thawn lai hian zirtirna dik lo, Greek-ho finna hmanga mite zirtira ei zawn nana hmang te an awm a. Gnostic zirtirna te pawhin mi a hruai kawi baw k a ni awm e. Thawnthu lamah an beng a za a. Rinna kawngah harsatna tam tak an taw k a. Chutih lai tak chuan Paulan, "Nang erawh chu engkimah fimkhur la, i rawngbawl na kha hlen rawh," a ti. Sakhuanain mi a hneh theihzia leh fimkhur a ngaihzia kan hmu. Sap pachal meuhte pawh Hindu sakhua biain an inha eng zuar ve mai zuk nia. I rawngbawl na kha i hlen theih loh nan zirtirna dik lovin a bual chau palh ang che. Engkimah fimkhur rawh.

3. Mosia: Mosia - Israel-te Aigupta bawih ata hruai chhuaktu, mi ropui, thlalerah te harsatna an tawh apianga an mawhchhiat, rilru leh ngaihtuahna tam tak seng, Pharaoa hmai sa tawngtu ni mah se, Kanan ram chu a thleng hauh lo. Nebo tlang aṅangin Lalpan Kanan ram a thlirtir a, "Kanan ram chu i lut lo vang," a ti tlat mai. Lungpui ata Israel fate leh ran rualte tan tui vaw chhuak turin Lalpan a ti a. Chutiang tak chuan a ti a. Israel fate leh an ran rual zawng

zawngin an in a, thlaler ramah an tui a lo hal leh a, Pathianin tui pe turin a ti leh a. Mahse, thil pahnih Pathian duh loh zawng a lo lang ta. Pakhatna - Lalpan Mosia chu lungpui vaw turin a ti tawh lo. Pahnihna - "Ka'n pek dawn che u hi" 'Pathianin a pek dawn che u hi,' ti lova, ama pek tur anga a sawi hi Lalpan a duh lo a ni. Kanan ram a lut ta lo. A thih khan vantirhkoh leh Setanan a ruang an inchuh hial mai. Mahse, hmel danglamna tlangah Lal Isua hovin an lo lang leh tih Bible-in min hrih. Kanan ram i lut lo vang e. Chapona te, tithei intihna te hian rawngbawl naa kan luah tur min luah lohtir thin. Min hlen loh tir thin baw. Fimkhur a va ngai em!

A tawp berah chuan Paula line leh Timothea line an awm. **Paula line** ka tih mai chu nun inlet thawk hi a ni a. Paula hi Kristiante tiduhdahtu, Juda sakhaw humhalhtu a ni a. Jerusalem-a Kristiante phuar chungah hrem turin a hruai thin. Chutiang ti tura a kal chhuah laiin Damaska khaw daiah Krista engin a chhu tlu a, a nun a lo danglam ta. Lal Isua tan a nun a pe. 'Nun hi Krista, thih pawh hlawkna' a ti ta hial mai.

Testimony pawh a ngah khawp mai. Hetiang mi hi Mizoramah kan tam awm e. Kei pawh hemi group-a mi hi ka ni awm e. Hemi line-a langho hi an that viau loh vek chuan testimony an nei zing dup duh a. Buh mal thlauh tam apiang an puar chuang lo angin, Testimony ngah apiang an tha chuang lo. Paula ang hi mi vang tak, mi bik an ni hial awm e.

Timothea Line: Pi leh pu a tanga Pathian thutaka chawm, pianthar lai awm chuang lo, a bilha tho ve hrim hrim, chatuan nunna thu leh Kohhran leh Pathian rawngbawl hna chu te tak te a tanga nunpui, Testimony, 'khalai tak kha' ti chuang lo, Van thlanga chho raih mai nun nei. Hei hi an tlo bik a, a mawi baw. Zoram thalaite hi khawi zawkah nge kan pian ang? Pian tirh a tanga Lalpa nunpui, nun ser awm lo hi a va ngaihsanawm em! Rawngbawl na hlen turin, nun inlet - Krista nunpuitu chuan pian tirh ata Krista zirtirnaa chawm len chu a chah a nih hi. Hei hi keini thalai leh nu leh pa, rawngbawltu zawng zawngte min chah a nih hi. "Chanchin Tha hritlu lam hna thawk la, i rawngbawl na kha hlen rawh. ♦

Hymn Story:

'THO LA, ENG RAWH'

—Chris M.S. Dawngkima
Ramhlun North

Rum 2014 hi Kristian Thalai Pawl tan kum tha, kum chhinchhiah tlak tak a ni. KṚP chuan kum 60 hmel hmuin, Diamond Jubilee kan lo hmang dawn ta reng mai! CKṚP chuan Jubilee pual hian General Conference-ah 'Theme Song' neih ni se tiin an rel a. Theme atan hian 'Tho la, êng rawh' tih chu Isaia 60:1 tlawhchhanin thlan a ni.

Kum 2008 khan, KṚP General Conference vawi 52-na, Bilkhawthlir-ah kan lo hmang tawh a. Khami tumah khan rilrua la awm chhin ngai reng reng lo, Conference Theme song 'A chhe lai siam thatu' tih phuah tura beisei ka lo ni a (hei hi KṚP-in Theme song kan neih hmasak ber a ni nghe nghe), chawimawina sang tak niin ka hria. Tun tumah pawh 'Diamond Jubilee' Theme song phuah tura min beisei thu, hruaitute ka aṭangin ka han hre thawi leh ta a; mak ka tiin ka lawm hle naa, ka huphurhna chuan min uai rit zawk mah. Thian thate hnenah ṭawngkain ka han pha zet a,

mahse, a buaipuitu tur committee tē, CKṚP-in a siamah chuan min telh zui ta hram a. Kan han rel ta ngei a; hla inphuahsiak emaw, hla phuah tura mi dang sawm chenin rawtna chu a awm ve a, mahse, kan hun neihten a zir loh avangin ruahmanna fel tak neia, duhthlang thei kan ni lohah inggaiin hla phuah chu ka kovah a tla ta nge nge a ni.

Mahni lam ka han inen a, ka tlin loh tur thil ti-ah riak ka inruat; mahse, an mi beiseina tihhlawhtlin tuma theihtawp chhuah ve phawt mai chu ka tih turah pawmin, Bible chang pēk - Isaia 60 chu ṭawngtaina nen ka han chhiar a, thlarauvin min hrilfiahsakin ka tuipui ta em em mai a ni.

March ni 31, Pathianni zan dar 9:00 a ni a, keyboard bulah Bible inchhawpin hla thu ka ziaṭan chu a ni ta der mai. 'Inspiration' (pawlna) tel lova hla phuah harsatzia hi a hre chiang ber pawl ka nih ka ring. 'A chhe lai siam thatu' tih leh, 'Tho la, êng rawh' tih hlatae hian inanna tak an nei; a Bible chang innghahnate hian 'phurna' min pe tlat. 'KṚP kum 60,' 'Isaia bung 60' han tih te hi a mawi danglamin, thupui an va thlang fuh teh lul em! Rei lo teah a hla thu ka peih a; keyboard ka han tum a, a thluk awm sa ring ang hrimin tui takin ka zaipui nghal mai nia!

Pathian chuan 'Êng' chungchang chu fiah takin min hmuhfir a. Ka suangtuahna mitah chuan thim zingah êng a lo awm a, chu êng lawma phengphehleleh rannung chi hrang hrang lo fuankhawmte chu ka hmu a. Chu êng ngei chuan hipna mak tak mai a nei tlat. Thawm ri eng mah a chhuah lo va, mi dangte a sawmin a ko chiam hek lo; a êngah chuan thim chu a tlan bo va, thim aţang chuan 'nunna êng' chu lawm turin rannungte chu hlim takin an lo chhuak mai a ni!

Keini hi Pathian tana eng chhuak tur kan nih lai hian, kan vel a mite hi kan êng lawm tur chuan an lo fuan khawm ve em le? He Bible chang hi a va hlu em! "Hnam tin i êng lamah an lo kal ang a, lalte pawh i lo chhuah ênna lamah chuan an lo kal ang," tiin Pathian chuan ênna neite 'thiltihtheihna' chu a lo sawi a, keini hi kan êng ve meuh maw? 'Thiltihtheihna' - Power chu kan nei ve em? Bung 60:1-ah khan, "Tho la, êng rawh; i êng chu a lo thleng a, LALPA ropuina chu i chungah a lo chhuah tak hi," tiin Pathian ênna ţawmpuia ênna pe chhuak tur kan nih thu min hrillh.

Vawiinah hian Chanchin Ţha hretu i nihna anga mi dangte hnenah, "Tho la, êng

rawh," ti tura chakna neiah i inngai lo a nih pawhin, nangmah leh nangmah ngei kha "Tho la, êng rawh," tia insawm turin kan ngen che a ni. Nang leh kei tal hian ênna chhe t  pawh kan pek chhuah chuan, LALPA ropuina chu kan chungah hian a lo va chhuak nasa dawn em!

Note: He hla ka ziah lai hian Isaia bung 60:1 thu hi a Bible thu ang taka hman ka duh avangin ka copy chhuak mai a. "Lalpa ropuina chu i chungah a lo chhuah tak hi" tih chu, "Lalpa ropuina chu i chungah a lo chhuah tak hi" tiin ka lo copy a, a thluk pawh chutiang chuan ka siam nghe nghe. Hla phuah chhante ziaka Bible ka han ennawn leh takah chuan, ka copy soal tih ka hre ta a. Amaherawhchu, a thu, Bible-a inziak hi chhiar a harin a fuh tawk lo hle tih a lang a; Mizo Bible edition hluite kan han en a, "... i chungah a lo chhuah tak hi" tiin, hlaa ka hman ang hi a lo ni fur a. Revised Standard Version & King James Version-ah chuan thuhmun deuh rengin, "...and the glory of the Lord has risen upon you," tih a ni bawk. Tuna kan hman tlanglawna mi hi tihsual palh, hawrawp hmaih palh a niah ngaiin hla thu hi thlak a ni ta lo. ♦

ITANAGAR KHAWPUIAH KRISMAS

— Malsawma Khiangte,
Secretary, Bethlehem Br. KṚP

2013-a Bethlehem Branch KṚP-ten kan project chu 'Ramthar zin' a ni a. Hemi tihlawhtling tur hian kum bul aṭangin hma kan la a. Khawi hmun nge tlawh ila ṭha ang tiin Synod Mission Board lamah te pawh kan zawt a. Anni thurawnte hre chungin ngun taka kan ngaihtuah hnuah NE Region chhunga Mission Field tlawh ngai loh ber nia kan hriat Arunachal West Mission Field chu kan thlang ta a ni. Tun hma lamin work camp-a kal an lo awm tawh tih loh chu he field hian tlawhtu a lo la nei ngai lo va. Tun ṭuma Krismas hmanpuia kan zuk kal thei hi kan lawm hle a, anni lam pawh an lawm ve hle a ni. Arunachal West Mission Field-a Krismas hmanpui tur hian member 27, mipa 13 leh hmeichhia 14-te chu December 21, 2013 khan Itanagar khawpui panin kan chhuak a. December 28, 2013 khan kan lo kir leh a ni.

An dinhmun: Kan zuk tlawh ber Itanagar Kohhran hi kumin aṭangin bial thar a ni a, January 12, 2014 khan hawn a ni. He Kohhran

hi Arunachal West Mission Field ṭhuthmun niin, Field Secretary Rev. Lallianmawia Pachuau-in a awm chilh a. Thawktu: Craft teacher - 1, Evangelist - 5, Literature Worker - 1 an awm mek a ni. Itanagar khawpui chhungah hian kan kohhran mi 160-170 vel an awm mek a, he khawpuiah hian kan kohhran kan luh tlai avangin Baptist, Revival leh Doni Polo (Ni leh thla bia) te kan zat lo a ni. Tin, Kristian an tam lo hle a, Kristian awm chhunte chuan Kristian an ni tih entir nan an inah arsi an khai a ni. Rawngbawl a harsa em em a, direct evangelism chu an rawngbawl na kalpui dan tlangpui niin, kum 2013 chhung khan evangelist pakhatin ring thar mi 14 zel nei ang an ni. Synod-in school a la neih loh avangin indirect evangelism lam kalpui a la har deuh a, puanṭhui zirna chauh la buatsaihin, 2013 chhung khan mi 7-in ṭha takin an zir chhuaka. Zirlai zinga ringlo mi pakhat chuan Baptisma a chang nghe nghe a ni.

Itanagar khawpui chhungah hian Itanagar Kohhran chiah hi Biak In nei an ni a. Fellowship pali - Nagarlagun, Chhah Kilo, Vivek Vihar leh Bowb - II te chu school leh mi inah an inkhawm ṭhin a ni. Baptist Kohhran leh Revival-ten Biak In an neih ṭhat avangin ringtu siam kawngah pawh kan evangelist-ten harsatna an tawh pah a. Heng fellowship-ten Biak In an

neih theih ngei nan kohhran mipuiten tawngtaina lamah tan i la ang u.

Zin kawng: Tar lan tawh angin December 21, 2013 Inrinni zing dar 9:30-ah Aizawl kan chhuahsan a. Tlai dar 3:30 velah Vairengte thlen hma hretin Vairengte bus nen kan inpel soal palh tih loh chu kan tuang hle. December 22, Pathianni tlai dar 4:30-ah Itanagar Mission Compound chu tuang takin kan thleng a, Field Secretary Rev. Lallianmawia Pachuau leh Kohhran mipuiten min lo hmuak a ni. Kan zin kawng a thui deuh avangin kan chau tlang a, zan lamah programme nei lo-in zanriah ei khamah kan mutna tur lam panin kan mu nghal a ni.

Thlenna leh ei leh in lamah mahnia inngaihtuah vek tura inbuatsaih sa kan ni a. Amaherawhchu, thawktu lamin rem an ti lo va, an chenna building-ah min riahtir a. Ei leh in lam pawh anmahni vekin an ngaihtuah a, kan tih ve chhun chu eirawngbawlpui a ni ta mai! Kan lawm hle a ni.

Itanagar khawpuiah: December 23, Thawhtanni-ah chuan Krismas nia kan inkhawmna tur fellowship hrang hrangte tlawhin kan kal kual a. Hei bakah hian State Museum leh Buddhist Monasteries-te kan tlawh baw. Tlaiah Mowb-II

Fellowship-a mi Pu Tech Moya leh Pi Hannang-te nupa-in Itanagar Bial chhunga kohhran member zawng zawngte nen chaw eiah min sawm a, a lawmawm hle. Zan lamah variety programme hmangin hun hlimawm tak kan hmang. He programme hi duan sa a ni lo naa item neih a ngai ta si a, Krismas kan hman chhunga kan item neih tura kan lo inbuatsaih - Solo, cheraw, group singing leh zaipawl kan nei ta a. Kan item inbuatsaih sa chu a zo titih ta der mai!

Hmun khawharah: December 24, Uralawk Ni a inher chhuak a, Aizawl lamah chuan mi an sahawkan ang a, bazarah pawh mahni mamawh lamin mi an tam hle dawn a ni tih hre reng chungin, hmun khawhara kan missionary-te kalkawng kan zawh ve tan ta. Tukthuan ei khamah group 5-ah inthenin Bible tract - Hindi leh English semin Itanagar khawpuiah kan feh chhuak a. Kan luhna in apiangah Bible tract sem bakah kan tawngtai nghal zel baw.

Mipui chu an tam, hmelhriat erawh an vang. An vang a ni satliah lo, Lal pian hun lawm tura inbuatsaih hmuh tur an awm lo va, Lal lo piang chu tu nge a nih pawh an hre lo. Mipui tam si, hmun khawhar ni baw si-ah chuan kan missionary-te hniak hnung zuiin kan feh chhuak a. An ni tin hun hman dan tur leh an

rawngbawl dan harsat tur zia kan hriatpui chiang hle. Ni khat chung lek an hnung zuia kan awm ve thei kha kan lawm a, khâng kan rawngbawl na tlawm tak kha Pathianin mal a sawm ang tih kan ring tlat a ni.

Ur lawk Zan a lo thleng ta. Mitthlaah Aizawl khawpui a cham lo thei lo a, Biak Ina mipui khat tlat inkhawm laite pawh a lo lang uaih uaih mai. Itanagar Kohhranah erawh mi 100 bawr velin khawhar takin 'Zan thianghlim' kan hmang ve a. Tam lo mah ila, 'Zan thianghlim' kan hman tawh zawng zawnga ropui ber erawh a va ni chiang em! Hetah hian kan branch a tângin inkhawm tanna hun kan hmang a ni. Inkhawm banah fellowship hun hlimawm tak kan hmang a, kan item inbuatsaihte tha takin kan ti thei bawk. Zan dar 12:00 nghah thlen ngei ngei a ngai a, chutah chuan Arunachal Chief Minister-in Kohhran tana Cake lian tak mai a pek chu hlim takin kan ei ho va, Arunachal Chief Minister hian kum tin Kohhran tan cake a pe thin a ni. Tichuan, Krismas chu a in tan ta.

Krismas tak tak: December 25, Krismas Ni-ah chuan group 5-ah in thenin Itanagar Kohhran leh Fellowship pali-ahte hun kan hmang a. Group tin leader-ten thupui inang, 'Fapa pekin kan awm ta' tih kan sawi. Kohhran Upa tan pawh

Krismas Ni-a hun chan a har laia Krismas chawhma ngei maia thupui sawi theia kan awm hi kan vanneihzia leh ropui kan tihzia sawi ngaihna kan hre lo. Chawhnu lamah Fellowship hun hlimawm tak kan hman hnu-in tlaiah Krismas ruai kan theh a. Ruai theh zawhah Mission Compound pawnah variety programme hlimawm tak kan hmang a, chhintu pawh kan ngah hle. Zan lamah inkhawm a awm tawh lo naa, in chungah kan zai khawm a, Krismas hla leh thalai hla kan sa a. Thlarau Thianghlimin min awmpui a, zai a nuam a, kan kham lo hle a ni.

Dam takin le: December 26, Krismas ruai theh ni tlai dar 6:15-ah khan Itanagar khawpui chhuahsanin Aizawl kan rawn pana. December 28 tlai dar 4:30-ah dam takin Aizawl kan rawn thleng leh a ni.

Itanagar khawpui a Krismas kan hmang thei hi kan lawm a ni satliah lo va, kan missionary-te rawngbawl dan a taka kan hmuhpui thei kha kan lawmna tizualtu leh chakna min petu chu a ni. Khang rinnaa kan unaute nen khan 'Dam takin' tiin inthlah mah ila, he khawvelah hian damin kan inhmu leh tawh lo mai thei. Mahse, kan tum van nuamah khian 'Krismas tak tak' hmangtute kha dam takin kan intawh leh ngei kan ring tlat a ni. ♦

HARSATNA

— Zairemmawia Renthlei
Republic

Mihring zawng zawng hi kan hring nun kalkawngah hian thil hrang hrang kan tawk vek a, kan thil tawn te pawh danglam hret hret mah sela, a tlangpui chuan a kalphung chu a inang deuh vek awm e. A chang chuan kan duh zawngin thil a kal tuang viau zel a, nuam kan tih zawng leh kan rilru mil tak te kan chungah a thleng thin a. Nimahsela, a chang hi chuan kan duh loh zawng tak mai, kan lo huphurh leh hreh ruk tak te pawh kan chungah a thleng fo thin a ni. Heng kan chungah thleng tura kan duh loh, thleng tho thin te hi harsatna, manganna, buaina ti tein kan sawi thin a ni. Harsatna hi taksa lam thilah te, rilru lam thilah te leh thlarau lam thilah te kan tawk thin a ni. Harsatna tawk lo mihring kan awm awm lo ve. Chuvangin, heng harsatna, manganna kan tihte hi hringnun peng pakhat ve reng, kan tlansan theih miah loh an nih avangin zir chian pawh a tul hle a; kan thupui atan pawh ka rawn thlang a ni.

1. Kan tuh rah kan seng

Thufingte 12:21 - Mi dikte chu thil tha lovin a tlakbuak lo, mi sualte erawh chuan manganna an tawk thin. 13:21 - Mi sualte chu mangannain a tlakbuak thin a, mi dikte erawh chuan thil tha an dawng ngei ang.

Genesis 3:16 Hmeichhe hnênah chuan, "Irehawmna leh i nau paina chu nasa takin ka tipung ang a; hrehawm takin fa i hring thin ang a; nimahsela, i duh zâwng chu i pasal lam a ni ang a, ani chuan i chungah thu a nei fo vang," a ti a. 3:17 Tin, Adama hnênah chuan, "I nupui thu i zawm a, thing pakhat, 'A rah i ei tur a ni lo' tia thu ka pêk che kha, a rah i ei avângin lei hi nangmah avângin ânchhe dawngin a awm ta a ni; i dam chhûng zawngin rim taka thawkin a rah chu i ei tawh ang; 3:18 hling leh buarte pawh a chhuaksak ang che; tin, leia thlai chu i ei tawh ang; 3:19 tin, leia i kîr leh hma loh chuan i hmaia thlantui luang zawih zawihin chaw i ei tawh ang; lei ațanga lâk chhuah i ni si a: vaivut i ni a, vaivutah i kîr leh tûr a ni," a ti a.

Heng bakah hian mi tinin kan tuh rah kan seng tur thu hi hmun tam takah ziaa awm a ni. Vawiina kan nuna harsatna lo thleng tam tak hi chu kan thil tihsual rah kan seng a ni awm e. Kan hrisel lohna chhan tam tak te pawh hi kan thil tha lo tih thin avang a ni tih hrilh hran ngai lovin kan hre awm e. Kan

pumpui tha lo te hi kan ei leh in fimkhur loh vang te leh kan nunphung dik loh vang liau liau a ni fur awm e. Kan mit tha lo te, kan lu na thin tam tak te hi chu TV leh computer kan thutchilh tam lutuk vang te leh kan men rei lutuk vang te a ni. Zu leh ruih theih thil, meizial, sahdah, kuhva, tiranga tih vel hian kan taksa leh rilruah te harsatna tam tak min thlen thin a ni. Nulat tlangval leh mipat hmeichhiatna kawnga kan hawiharh lutuk te hian kan tawn loh tur harsatna tam tak min siam thin bawka ni. Zirna kawngah leh eizawna kawngah te pawh hian kan thatchhiatna leh inthlahdahna te hian harsatna min thlen fo thin bawka ni. Heng harsatna, kan nun kan uluk loh avanga kan tawrh thin te hi a then chu rawn lang nghal mai te a awm a, a then erawh chu han inmung deuh chi te pawh a awm a, a then te phei chu hun rei tak, kan chin dan tha lo kan sim hnu daih tawha min vaw let thin te pawh an awmbawk.

Heng harsatna bik te hi pumpelth theih an ni fo mai a, nun uluk deuh chuan an tawng tlem deuh a, uluk lo deuhin kan tawng tam deuh mai niin a lang. Chuvangin, harsatna, buaina leh manganna tam tak kan tawrh loh tur pui kan tawrh loh nan nun uluk a pawimawh hle a ni. Heng harsatnate hian keimahniah chauh nghawng a nei lo va, kan hmangaihthe, kan chhungte, thianteh leh rawngbawlpuite pawh

a kangkai tel zel a ni tih kan hriat tel a tha awm e.

Entirna atan Samsona nun kha han en ila, a nu leh pate thu awihin ringlomi Delili kha nupui ah nei lui lo sela chuan khati khawpa mualphona leh tihretheihna kha a tuar awm lo ve. Lal Davida pawh kha Uria kha thahtirin a nupui kha uire lo sela chuan a chhungkuaah inpawngsualna, inthahna, helna leh hengina a ken tel rilru hrehawmna leh manganna kha a pumpelth a rinawm a ni. Hetiang entirna hrang hrang hi Bible-ah leh kan ni tin nunah pawh sawi sen loh a awm awm e; chuvangin, tun achinah harsatna tam tak kan pumpelth theih nan kan nun te Pathian duh dana hmangleh nung turin kan han inngen nawn leh a ni.

2. Khawvel سوالنا کان توار

Thup. 12:9 Tin, drakon lian pui, rulpui tar Diabola leh Setana an tih, khawvel zawng zawng bumtu chu an paih thla ta a; leiah an paih a, a tirhkohte pawh an paih thla tel ve a.

Eph 2:2 chungachte chuan hmanah khan he khawvel dan anga in awm kha, boruaka thuneihna lal, tuna awih lo fate chhunga thawk mektu thlarau dan ang hian. 6:12 Kan buante hi tisa leh thisen an ni si lo, lalnate leh, thuneihnate leh, he thim chung a khawvel roreltute leh, van hmunahte thlarau سوالho awmte an ni zawk e.

Heb.11:37 lunga denin an awm a, thingzainaa zai bunin an awm a, thlemna an tawk a, khandaiha sah hlumin an awm a; beram vun leh kel vun sinin an vakvai a; rethei takin, hrehawm takin, tihduhdahin an awm a; 11:38 (chungho tan chuan khawvel hi awmna tlak a ni lo) thlalerah te, tlangah te, pukah te, khuarkhurumah te an vak an vak ðhin a.

Kan han chhiar tak ang khan he kan chenna khavel hi soal thitihtheihna hmun a ni tih kan hriat a pawimawh awm e. Soal Setana leh a pawlthe thuneihna khawvel ah hian hrehawm tam tak, ðam te, chhiatna rapthlak tak tak te, inthahna te, inpawng nekna te, duhamna te, mi rethei rahbehna te leh min tihrehawm ðhin harsatna tam tak, ni tin a thleng fo ðhin a ni. Kan Lalpa lo kal leh hma loh chuan heng harsatna te hi chu kan pumpel h rih dawn loh hmel avangin he lei ram mi kan ni lo tih hre rengin kan ram hlun tur Lalpa'n min buatsaihsak lam chu kan thlir thiam a pawimawh hle a ni. Khawvel سوالنا hi rei lo te chauh kan tuar tawh dawn tih leh kan chatuan ramah chuan heng harsatna te hian min tibuai dawn tawh lo tih hi kan theihnghilh loh a ðul em em a ni.

2Tim 4:18 Lalpa chuan سوالنا zawng zawng lakah mi chhan chhuak ang a, a vanramah chuan him takin mi thlen ang; amah chu chatuana ropuiin awm rawh se. Amen.

3. Pathian hnathawh:

A. *Pathian zilhhauna.*

Thufingte 3:12 LALPA chuan a hmangaihte chu a zilhhaun ðhin a ni, Pain fa a lawm apiangte a zilhhaun ðhin ang hian.

Jona 1:4 Nimahsela LALPA chuan thli na tak mai tuifinriatah chuan a tlehtîr a, tuifinriatah chuan thlipui nasa tak a tleh a, tichuan, lawng chu a keh dâwn ang maiin a awm ta a. 1:17 Tin, LALPA chuan Jona lem tûrin sângha lian tak a lo ruat tawh a; chu sângha kawchhûngah chuan Jona chu ni thum leh zan thum a awm a.

Pathian mite leh rawng-bawltute Pathian duh dana kan awm loh hian Pathian zilhhauna kan tawk fo a ni. Jona chanchin a kan hmuh ang hian kan nunah Pathian thiltum a lo thlen theih nan a chang chuan harsatna hmangin Pathianin min zilhhaun ðhin a ni. Ama lakata kan lo hlat hian Pathian chuan harsatna hmangin min hnuh hnaih a tum fo ðhin a ni. Chuvangin, hetiang zilhhauna avanga harsatna kan tawh hi chuan Pathian hnenah lawm thu kan sawi zawk tur a ni, min hmangaih avanga fate ang min zilhhauna hi ringtute tan chuan thil hlu tak a lo ni zawk a. Pathian zilhhauna kan la tawk ngai lo a nih chuan zilhhaun ngai miah lo fa fel tak kan nih loh vek pawhin fa nihna kan la nei lo zawk pawh a ni mai thei. Chuvangin, heng zilhhauna avanga harsatnate hi mahni inenlet nân kan hman thiam a ðha awm e.

Rom 8:28 Tin, Pathian hmangaihtu, amaha ruat anga a kohvate tan chuan, an thatna turin engkimin a thawhsak hlawm thin tih kan hria.

B. *Pathian training.*

Genesis 22:2 Tin, ani chuan "I fapa, i fapa neih chhun, i hmangaih tak, Isaaka ngei kha hruai la, Moria ramah chuan kal la, chutah chuan ka hrihl tûr che tlâng pakhatah chuan hâlral thilhlana hlan rawh," a ti a.

Exodus 3:1 Tin, Mosia chuan a pu Jethroa, Midian ram puithiam berâm rual a vêng a: tin, berâm rual chu thlalêr thlang lampangah chuan a khalh a, tin, Pathian tlâng, Horeb chu a va thleng a.

I Samuela 19:1 Chutichuan Suala chuan a fapa Jonathana leh a chhiahhlawh zawng zawng chu Davida that tûrin a ti a.

Matthaia 4:1 Chumi zawhah chuan Isua chu Diabola thlema awm turin thlalerah Thlarau hruai luhin a awm ta a. 4:2 Tin, ni sawmli leh zan sawmli a nghei hnuin a ril a lo tam ta a.

Thuthlung Hlui leh Thuthlung Thar bu te kan chhiar chuan Pathianin a mite harsatna hmangin a chher hriam thin tih hmun tam takah kan hmu a ni. Rawngbawl tura a tirh chhuah hmam Pathian chuan a mite chu harsatna hrang hrang hmangin a chher hriam phawt thin tih kan hmu a ni. Heng harsatna te hian

ringtute nunah inngaihtlawmna te, huaisenna te, dawhtheihna te, rinna te, finna te a pe thin zawk a lo ni. Kan chhiar tak ang khan kan Lalpa Isua ngei pawh kha rawngbawl a a chhuah dawn khan thlalerah tihrehawm leh thlemin a awm phawt a nih kha. Keini a hnung zuitute pawh hi chu chu kan kalkawng zawh tur a ni tih kan hriat a tha awm e. Kan nunah hian hnawk tam tak, Pathian hnathawhna dal thin a awm a, chung mihring hlui zia kan tih thin te chu Pathianin min paih thlaksakna kawng hi a nuam hranpa ngai lo. Chuvangin, hman tlak ni tur chuan hrehawm tam tak kan tawrh a ngai thin a ni. Rangkachak chu mei hmangin an tithianghlim a, an chher thin angin, thir chu hmanrua atan an chher thin ang te in keini pawh hi hman tlak ni turin Pathianin harsatna hmangin min chher hriam thin a ni. He Pathian training-na hi kan hmuh thiam a pawimawh hle mai, rawngbawl turin kan inbuatsaihnaah hian harsatna kan tawk miah lo a nih chuan inngaihtuah nawn deuh kan ngai zawk mai thei a ni.

Hla siamtu chuan heti hian a lo ti a ni -

*Ichungah khua lo dur se ringhlel suh la,
Pathianin engkim chungah ro a rel a;
Khaw dur khaw thiang nenin lei a lo
tha si,
Mihring siam that nan khaw dur a ngai
a ni.*

C. *Hmangaihte tana malsawmna.*

Genesis 6:14 I tân fâr thingin lawng siam rawh; lawngah chuan pindante i siam tûr a ni a, a chhûnglam leh a pâwn lam tûr chu far hnai i hnawih vek bawk tûr a ni. 6:15 Tin, hei hi i siam dân tûr chu a ni: lawng dung lam chu tawng zathum ni sela, a vâng lam chu tawng sawmnga ni sela, a san lam chu tawng sawmthum ni rawh se.

Luka 23:33 Tin, lu ruh an tih hmun chu an thlenin, chutah chuan krawsah an khengbet a, mi sualte nen, a ding lamah pakhat, a vei lamah pakhat.

Ringtute nunah hian keimahni vang ni lo hian tawrhna te pawh hi a thleng thei ve fo bawk a ni. Nova chu Pathianin kum za teh meuh mai lawng a tuktir a ni. A hun lai ngaihtuah chuan harsatna nasa tak niin a lang. Tunlai khawvel atan pawh thil namai a ni lo. Eng vangin nge kan tih chuan amah leh a chhungte chhan himna atan a ni. Hmangaihte'n malsawmna an chan theih nan hmangaihtuten kan tuar a ÷ul fo a ni. Pathian hian mihring siam ÷hat nan hian an bul hnaia anmahni hmangaihtute tawrhna hmangin min ko fo a ni. Chuvangin, keini pawh kan ring kan tikhawng lui tlat a nih chuan kan bul hnaia kan lainaten keimahni vangin an

tuar ang tih a hlauhawm khawp mai.

He tuarna entirna ÷ha ber chu kan Lalpa Isua Krista kha a ni. Keini suala tluchhe tawh hnu mihringten nunna kan lo neih leh theihna turin Pathian Fapa chu mihringah a lo chang a, nasa tak a hmusitna leh elrelna a tawrh hnuin a mualpho thei ang berin krawsah khenbeh a ni. Kan Lalpa Isua khan thil a tisuah hauh lo. Zilhau leh training pawh a ngai hran lo; nimahsela, tawrhna azawnga rapthlak ber chu keini hmangaihten malsawmna kan dawn theihna turin a lo tuar ta a ni.

4. **Setana hnathawh**

1:12 Tin, LALPA chuan Setana hnênah chuan, "Ngai rawh, a neih zawng zawng chu i kutah a awm e, amah tak erawh chu khawih suh angche," a ti a. Tichuan, Setana chu LALPA hma ata a chhuak ta a.

A tawp berah chuan hmelmaha Setana beihna avangin harsatna kan tawh ÷hin tih kan hriat a pawimawh awm e. Heng harsatna erawh hi chu rawngbawltute chungah a thleng ber awm e. Kawng hrang hrangin Setana hian Pathian mite hi a bei ÷hin a ni. Amaherawhchu, hnehna chu Lalpa ta a ni tih kan hriat reng chuan heng harsatna te hi kan tan chuan malsawmnaah Pathian chuan a chantir ÷hin a ni. ♦

ṬHALAITE LEH KUM THAR

— Rohmingthanga
Hualngohmun

Pathian venna leh hruaina zarah kum 2013 kan lo hmang liam a, kum 2014 chu kan lo chuangkai ta reng mai. Ṭhenkhat te chuan kum te pawh kan lo hmang liam tam fe tawh mai thei a. Amaherawhchu, khang kan kum hman takah te khan eng thil ṭha nge kan tih inzawt ta ila kan thil tih te kan chiang ber awm e.

Kum a lo thar hian ṭhalaiterilruah eng nge lo lang? Kum hluia kan tih dan ang bel bel khan em ni ka nun leh anga ka tih leh ang, kum hluia ka indaih lohna te hre reng chungā ṭan lak hi ka tih tur a ni dawn lawm ni. Kum tharah chuan hei aia nasain kohhranah leh khawtlangah ṭhahnem ngaih tum ta ila, ṭhalai ka nihna hi kum thar hian lo tizual sela, mite tan leh chanhaite leh chhungkaw tan ṭangkai ka tum tawh ang tih intiam ta ila a va ṭha awm ve.

Eizawwna kawngah pawh kum kal ta aia ṭan lak i'n tum teh ang. Ṭhalaiten kawng

engkimah ṭan kan lak chuan Kohhran leh khawtlangah hnuhma kan nei ngei ang. Chuti ni lova kan zelthel chuan kum kan hmang liam leh mai mai ang a, nawmsak ni kan nei lo ang. Kan mut zun zuna kan tlan puat puat chuan miten min lehpel ang a, rual kan awt leh si ang a.

Ṭhalai kan ni a, thil siam ṭhat theih tawh lo kan lo tiin kan lo tisual tawh pawh a ni thei e, he kum tharah hi chuan sim ila, chhungkuaah hma thar latuah i'n ṭang teh ang u khai.

KTP, YMA member ni si kawng tinrenga sawisel kai tum lo ila, ṭhalai ka nih anga kawng tinrenga chhawrnahawm kan lo nih theih nan kum thar hi ṭha taka hman i'n tum teh ang u. He kum tharah hian thiam pakhat tal neih belh tum baw k ila chhungkua tibuaitu ni lova ti-hlimtua te ṭan i'n tum teh ang.

Pathian thu hriatna lama hmasawn te tum ila, ṭhalai ni si Pathian thu hriat loh lutuk te hi a zahthlak a ni tih hi i vawng reng ang u. Pathian thu mite hrih thei turin mahniin kum tharah chuan Bible i chhiar uar ang u.

KTP member ni si chhungte chawm hlawm nih reng te hi

thil zahthlak a ni tih hi i vawng thar leh theuh ang u. Kan la thawk chhuak ve lo a nih pawhin chhungte thawh chhuah sa ren taka hman dan te thiam ila a tha awm mang e. Chhungte tana phurrit lutuk nih hi tum lo bawk ila, duhte hi ngah lo thei ila a tha awm e.

Thalai nih chuan intodelh tum ila a va ropui dawn em. Tu mah mahnia ding thei kan awm lo naa, heng in chhung mamawh – bawngtuthlawh, suahdur, tuboh leh a dangte...kan sawi seng lo vang. Mite ban buai ngai lovin mahnia intodelh hram i'n tum teh ang.

Lehkha te kan la zir a nih pawhin tha taka pass thei turin insangphek ila kum danga kan zir ang mai mai te hian zir ta lo ila hma lam pan tum ranin i zir ang u. Thlaruah leh khawvel thilah pawh hmasawn zel i tum ang

u. Kan thlen chin atang khan hma sawn i tum theuh ang u.

Tin, kan incheinaah te hian hleihluak lutukin inchei lo ila, mite hmuha mawi tawkin inchei thiam zir ta ila, a lo nei deuhte pawhin kan thawhpuite mil deuh tein inchei dan te zir thar ila, a nei lo deuhte pawhin a nei deuhte kha awh ve kher tum lo ila kan hlim ngei ang.

Thalai ni si, zinga nu leh pa kaihthawh ngam loh nih hi a mawi lo va, a zahthlak a ni tih hi i vawng reng bawk ang, kum thar atang chuan i sim hmak ang u. Nu leh pate hi an mawl emaw, an fing emaw i zah hluah hluah ang u.

A tawp berah chuan he kum tharah hian hlawhtling tak leh hmuingil i duh chuan i nun kha Lalpa tan pe la, ani'n a lo chawimawi ang che.♦



*Hma lam hun neia i inhriat chhung chu
I nun siam that nan hun i la nei tihna a ni.*

*Naktuk i thlir tlat phawt chuan
I nunna chu beisei awm lo tawp tihna a ni lo.*

*Tawngtaina hun i la nei a nih phawt chuan
I hliah leh i thilung na a la dam thei tihna a ni.*

*I tukverh atanga khawfing chat i hmu theih chhung chuan
Pathianin a thutiam a hlen avangin lawm thu sawi rawh.*

HNATHAWH

(Bible thlirna aṭangin)

- C.V.L. Chhanhima
Chanmari, Aizawl

Mi tu pawh mai fuke kim leh mi pangngaia lo piang chhuak tawh phawt chuan hringnun a hman chhoh zelna turah, mathei lova a hmabak tih tur a kova tla a hlen ngei ngei tur chu hnathawh hi a ni ti ila kan sawi sual tam lo vang. Chutianga mihring nuna bet tlat chu engtiang chiaha pawimawh leh hlu nge a nih tih hi i'n zir ho teh ang.

A ṭobul:

Hnathawh lo awm chhan leh a ṭobul hi a ril hle a. A tirin Pathianin awm lo ata lei leh van a siam a, a chhunga awm tur zawng zawngte a din fel hnuah chhak lama Eden huan a siam enkawl leh vengtu tur atana mihring (Adama) a lo ruat aṭang khan a inṭan daih tawh a ni (Gen 2:15). Heta enkawl leh vengtu nihna dinhmun hi mawh-phurhna kova tla, hlen ngei tur a nih tlat avangin hnathawh tih ṭawngkam tho a ni a, sawi hnan theih a ni lo. Tin, mihring chuan Pathian thupek a bawhchhiat avangin, a lo chhuahna vaivuta

a kir leh hma loh zawng rim taka hna thawka, hmaiah thlan tui far zawih zawih chung a thawh rah ei tawh tura tih a ni (Gen 3:17-29). Heta ṭang hian hnathawh hi engtia lo awm nge tih leh eng vanga mihringte nuna bet tlat nge a ni tih chiang takin a hriat theih awm e.

Hnathawh hi Pathian zia a ni:

Kan Pathian hi hna thawk ṭhin, awm mai mai ngai lo a nihzia tichiang em emtu chu— Lei leh van leh a chhunga awm engkim siama enkawl leh veng a awmpui reng ṭhintu a nihna hi a ni. Chu zia chu amah zuitu ringtute hian kan chhawm ngei a ngai. Kan inngahna Bible kan en chuan, Pathianin hnathawh a ngaih pawimawhzia leh taimak hlutzia te, chu chuan rah duhawm tak a chhuah ṭhinzia hmuh tur a tam hle (Thuf 10:4; 12:24; 13:4; 21:5, etc). Tirhkoh Paula phei chuan, *"Tu pawhin hnathawh a duh loh chuan ei pawh ei suh se"* (2Thes 3:10) a ti a. Helai thuin a sawi tum ber nia lang chu hnathawh loh chuan ei leh in tur te, dam chhung khawsak mamawh a awm ngawt lo va. Hrisel lo leh rualbanlo i nih ngawt si loh chuan, in tun nun/dam khaw chhuah nan hna i thawh ngei ngei a ngai a tihna a ni. Rev. Lalfakzuala paw'n, *"Hnathawh i hreha, i thawk peih lo a nih*

chuan Setana ramri chhungah i awm reng tih inhria ang che," a ti hial a ni.

Taimakna hi Pathian malsawm dawmna leh hlawhtlinna bul a ni:

A hun laia khawchhak fate zinga ropui ber te zinga mi Joba, mi neinung tak, khati khawpa a lo hausakna chhan thuruk chu Pathian duh dan anga nunga hnathawh a taimakna avangin, a kut hnathawh te Pathiannin a malsawmsakna vang liau liau a ni. Mi ropui leh hmingthang khawvel awm chung pawha hming dai tawh lo tur te leh wawiina dinhmun awhawm taka dinga, mi entawn tlakteho hi a tira an bul ñan añangin taima taka hna an lo thawh rimna rah a ni zel mai. Chuvangin, Pathian ñih tlat chunga ñhahnemngai leh taima taka hnathawh ñhin mi chu Pathian pawhin a hriatsak renga, a sarhu lain malsawmna leh hlawhtlinna chang nghal lo mah sela; khua reiah chuan zep rual lohvin a par chhuak nge nge ñhin a ni.

Thatchhiat hi Setana lawm zawng leh tlakchhiatna bul a ni:

Setana mizia leh nihphung chu a dik leh ñha lam kawng reng reng do va, hnial kalh char chartu a nih miau avangin, hnathawh thatchhiatna pawh hi a duh dan leh a hmanrua ñha ber ber a ni tlat a. Mi tin mai hi

thatchhe tak leh dawngdah taka awm turin min duh a ni. Chuvangin, kan hnathawh duh dan leh ei kan zawn dan kawng te hi a dikin a fel tawk em tih pawh hi kan inenfiah a ñul hle mai. Zelthel tak run dal ang leka thawka, mahni hna ngai pawimawh lo te, kuttling lova eizawmna kawng hrang hrang te, mi chan tur ai pawh lo laksak duhna te, hlep ruk, ruk ruk, sex leh dawt hmanga sumdawng, mahni leh chhungkua te chauh inhaivûr duhna thinlung te pawh hi thatchhiatna rah dik tak a ni a, Pathian huat zawng tak leh Kristianna nen pawh engtiang maha kal kawp thei ngai lo a ni.

Hetiang hmanrua hman avanga vawi leh khata hlawk thur thur te hi awhawmin lang bawh ñhin mah sela, a tlo ngai lo va. A tawpah chuan tlakchhiatna leh boralna kawng zawhtute mai an ni leh fo ñhin (Thuf 21:5). Pathian thu chuan, '*A hnathawha dawngdah pawh tiboraltu unaupa a ni,*' a lo ti hial a (Thuf 18:9). Chuvangin, hnathawh thatchhiat pawizia leh chutiang mite dinhmun chhiatzia chu Bible-in hmun tam takah min hrilh a. Kawng dik lo min zawhtirtu, Setana bawih nihna piah lamah a ñha zawnga hmasawmna tluantling min neih tir thei lotu a ni fo ñhin a ni.

Eng dinhmunah nge i din ve le?:

A bik takin thalaite ngat phei chu hmel lanna ber leh tehna fung, meizang hlaptu tur kan nih miau avangin awm mai mai tur kan ni lo. 'Khawi maw' tia diltu nih reng mai mi nih hi thil zahtlak a ni tih hriain, 'kha' tia petu nih tum zawk ila. Chu chu mi dangte tana malsawm nihna bul a ni baw. Chutiang zelin, KṚP member emaw, hruaitute zingah ka tel ve a nih ngat phei chuan, faith promise chungchangah chhungte pur lova ka intodelh a ngai a. Chutiang ti thei tura mi puitling leh Pathianin min ruat chhan pawh a ni tih i hria ang u. Chumi ram thleng tura thil pawimawh tak chu **intodelh tura hnathawh taimak** tho tho a ni.

Mahni duh zawngah chuan huamhauh leh thahrui neia chak tak, hrisel em em chaw heh baw si. Mahse, hnathawh kawngah chuan chuti hlauh. Ei lama ka u; thawh lamah ka nau ni leh sia, ei leh in duhtui viau leh lawi si te, hnathawh zahah la tlata rual elna nei si lova rualawt reng renga nung leh lawi si nih hi mihring nun phung tura siamtu min duan dan pawh a ni hek lo.

Zing thawh bak thawh leh chuang tur nei lo leh hnathawh tum miah si lova, mamawh leh duh zawng erawh ngah tak. Mobile hand set, cheng sing

chuang man neia engtik lai maha call balance nei ngai lo. Top-up man chhungte dil leh duk duk si te, chawm hlawm mai ni si a thil thar apiang duh ve zel si. Show room-a mi ngat thawmhnaw inbel tum leh si. Tih tur nei hauh si lova; khawlai fashion show nan hmanga nalh taka len zuar zuar te, a khawl chu sawi loh petrol man takngial pawh thawk chhuah hauh si lova, kawngpuoi hi ka ta vek ti ni awm taka bike/car hmanga chak fahrana tlan chiam chiam thin te hi hi thil zahtlak tawp khawk a ni a; bansan a hun tawh. Chutiang mi chu i lo nih ve vaih chuan, KṚP member tih tur a nih loh bakah, chhungkua, khawtlang leh kan ram than mawh baw dik tak te zingah i tel ve a ni tih inhria la, sim nghal vat rawh; tichuan, thil tha ti i ni mai.

Hetiang zawng hian:

Kan lehkhazir dan te pawh hi inenfiah a hun ta. Zirlai nih vang ngawta intodelh loh tur tihna a ni lo va, chhuanlam tling a ni hek lo. Thiamna chauh zir chhuaka kut hnathawh peih leh si loh leh intodelhna awm leh chuang si lo hi a hlutna a awm hauh lo. Tuna kan ram dinhmun en hian sawrkar hna ringawta inngat turin hna in min daih seng tawh lo. A hahdam leh nuam chin chiaha thawh tum

lovin, kan zir thiamna zozai te hi kut hnathawh lamah hmang ila, dinchhuahna tham eizawna tha nei turin kan ram leilung hi a la tha tawka ni tih hi i hre teh ang u.

'Hnathawh tur a vang' kan tih lai hian, ram dang mi, hnam dangten eng vangin nge kan ramah hian thawh tur an hmuh renga, dinchhuahpui nan an hman si le? Hengho hi kan inenna turin darthlang atan Pathianin min buatsaihsak a ni tih hria ila. Mahni intodelh nan ram leilung fate hian kan thawh ve mai a ngai a ni. Eng hna pawh hi a zahawm em em vek a. Taimakna leh tumruhna nena kan thawh phawt chuan din chhuahpuina tur a tling vek

bawk. Chuvang chuan, intodelh turin Kristian thalaiten ke i pen tan nghal ang u le. Chhungkua, khawtlang leh ram hmasawna thlentu ni turin kan Pathian chuan min thlir reng si a.

Tlangkawmna:

Hnathawh hi Pathian anchhia ni lovin, mihringte bawhchhiatna avangin kan chenna lei hi anchhe dawng a lo ni mai zawka ni (Gen 3:17; 5:29) tih hi kan hriat a tul tak zet a. Tun kan dinhmunah chuan hnathawh a zahthlak lohzia te, anchhia pawh a nih lohzia te, nasa lehzual zawka kan inhrilha, pulpit tlangah ngei pawh kan au chhuahpui a tul tawh tak zet a ni. ♦



BIBLE SCHOOL HRIATTIRNA

Presbyterian Bible School, Mission Veng, Aizawl-ah Session
31-na atan Certificate in Theology (C.Th) Admission hawn a ni a. Dil duhte tan a hnuaiat tan lan hi hriat tur a ni e –

Admission Form : Office hun chhungin a lam theih.
Dil hun chhung : April 30, 2014 (Nilaini) tlai dar 3:00 thleng.
Dil thei chin : Class VII passed, kum 16 chin, Kohhran dan chhunga awm.
Interview : May 2, 2014 (Zirtawpni) zing dar 10:00
Class tan hun : May 6, 2014 (Thawhlelni)
Zir hun chhung : May - August, 2014
Stipend : Zirlai hnênah thla tin Rs. 500 pek a ni. Hostel a awm lo.

Rev. R. Lalengmawia
Principal, Presbyterian Bible School,
Ph - 2317343 / 857308007



HRINGLANG TLÁNG

Cancer hnehtu

Ka hming chu Don Heding a ni a, Beaver Dam, Wisconsin (U.S.A)-a chengin kum 63-na ka hmang mek a. Ka nupuiin hrawk cancer vanga min boralsan hnuin tlai khaw hnuah nupui pahnihna ka nei leh a. Ka nupui hnuhnung zawok hi Thailand mi Saowanee a ni a, Buddhist sakhaw zuitu a ni nghe nghe a. Kan nupa hian fapa pahnih Patrick-a kum 7 mi leh Andrew kum, 6 mi kan nei a; kei hian fa hmasa Brett-a ka nei a, kum 29 mi a ni ve tazoh a.

Kum 1996 tazop lam khan thil ei lamah harsatna ka nei tan a, thil lem harsa ka ti thin khawp mai a. Kan chhungkaw doctor ka rawn a, ani chuan pum pui chak lo chi khat a nih thu min hrilh a, chutiang chuan min enkawol zui bawok a. Kum 1997 khan Chinese New Year hmang turin China ramah ka zin hnuin Asia chhimchhak lamah bawok ka han zin leh a, kan chhungkaw doctor-in min chawh damdawia ka inenkawol chungin ziaawm lam ka pan lutuk lo niin ka inhria. Chaw chakna ka nei lo va, thil lem ka harsat a, ka lem chhun pawh ka pai a nuam chuang lo bawok a. Ka zin hawm veleh kan chhungkaw doctor chu ka hmu leh a, ka harsatna chu eng chiah nge tih hre turin vawi tam ka taksa a test a, ngun taka ka taksa a ena, scan te a tih hnuin ka hrawk dawotah cancer hnuhma a hmu ta a, chutiang lam enkawol dan thiam bik pan turin min rawn nghal a.

Doctor chu ka va hmu a, duhthlan tur pahnih min lo pe a. Pakhatna chu eng mah ti lova thla 4 - 6 chhung vel tih nghaha awm tazop. A pahnihna chu cancer damdawia enkawol a ni. Nupui fanau nei ka nih awangin kan duh thlan tur chu inngaihtuah buai oak a ngai lo, a pahnihna hi awolsam tein ka thlang a.

Kum 1997 June thla chuan min zai a, August thla atanga tanin chawlhkar 7 chhung chemotherapy (chemo kan tih mai hi) kan khai zawm leh nghal a. October 4-ah ka hrawk an zai leh a, min zai hmain doctor chuan ka hrawk zai a dam theihna chu zaa 50 chauh a nih thu min hrilh lawok a. October 3 atanga a kum leh March 28 chhung chu ka kain eng mah ka ei lo va, ka kaw chhungah pipe an thun a, chumi kalltlang chuan ei tur min pe a. Hemi chhung chauh pawh hian ka rihna chu kg. 90 atangin kg. 57-ah a tla hman a ni.

Zah dawn lovin han inpuang ta ıla, ka tet laiin baptisma chu ka chang ngei mai a; mahse ka nupui ringlo mi a lo ni bawk nen, a kum telin ka rinna chu ka phatsan tial tial a, a tawpah phei chuan a pawimawh ber min chhandamtu Isua Krista chu ka hransan ta hle mai a ni.

Kum 1998 March 5-ah chuan Singapore ka tlawh ʔuma ka ʔhian pakhat kaltlang ka hmehhriat lehchhawng chuan ka hriselna thu-ah telephone-in min rawn bia a. Kei chuan ka hrawk dawt a cancer thu te, rei lo te chhunga ka rihna tlakhniam chakzia leh chaw tak ka ei theih loh avanga min enkawltu doctor leh ka chhungte pawhin a ngaihna tak an hriat loh te ka hrilh vek a. Hetih lai hian damdawia min enkawlna zawng zawng chu thlah vek a ni tawh a, a na zualpui a chhawk nan leh chaw ka chak theih nan marijuana min pe ʔhin a. Chaw pangngai chu eiin lem thei mah ıla rei lo teah ka luak chhuak leh vek ʔhin a; chuoangin, ka ril a ʔam thei em em mai a, chutiang chu ka dinhmun a nih avangin ka duh emaw, duh lo emaw thi turin ka inbuatsaih ru ta ringawt mai a ni.

Ka ʔhianpa chuan nasa takin min ʔawng thlamuan a, telephone-a kan inbiak lai la la pawh chuan min ʔawngʔaisak a, kei pawh ʔawngʔai ve turin min sawm a; ka ʔawngʔai phawt chuan Chhandamtu Isua Krista, hriakthiha chuan khawvel puma Kristian chhiar sen loh ʔawngʔaina a chhang ang bawkin ka ʔawngʔaina chu a chhang ngei ngei ang tih min hrilh bawk a. Darkar khat dawn lai kan inbia a. Chumi ni vek tlai lamah chuan Fr. Corsie S. Legaspi lehkhabu ziak 'Tichuan, an lo dam ta hlawm a..' tih bu aʔangin ka chhiar atan a duh zual phek 13 lai leh Singapore mi Ms. Irene Teo-in rilpui cancer nasa tawh tak ata ʔawngʔaina hmanga a dam tak dan a ziakna thutawi hi fax-in min rawn thawn leh bawk a.

Kum 1998 March 5 - 28 chhung khan he ka ʔhianpa hian vawi 4 telephone-in min rawn biak bakah vawi 5 lai fax min rawn thawn bawk a. March 26-a min rawn biak ʔum phei chuan Pathianah innghat pumphlum tur leh a tihdamna chu ring ngam turin nasa takin min fuih a. Min enkawltu doctor a bei a dawng tawh a, damdawiin ka inenkawl tawh hek lo; tih tur ka neih loh em avangin Bible ka keu va, ka chhiar ve ʔan ta a. Ka khawchhak ʔhianpa lah chuan Pathian thu chu chemo khai ai emaw, inhem emaw ai pawha chak zawk a nihzia thu-in min rawn fuih reng bawk a; chu chuan Pathian thu ka rinna pawh a tichak hlein ka hre nghe nghe a.

Kum 1998 March 5 aʔangin a kohhran member-ten chaw lovin min ʔawngʔaisak reng bakah chawlhkar 3 chhung chu ʔawngʔai pawl insiamin ka tan liau lian ʔawngʔaina hun an hmang ʔhin tihte min rawn hrilh zel a. Bible chhiar chu harsat hle mah ıla a tihdamna chauh chu ka beiseina awm chhun leh ka mamawh a ni tih erawh ka hre Chiang khawp mai a;

mahse, dawhthei tak leh chhel taka a Thu-ah ka intukluh pumhlum theih hunah chauh damna chu ka chang thei ang tih ka ring a.

Kum 1998 March 28 (Inrinni)-ah chuan ka muhil chu thawhphan aom miah lovin tuisik vawot taka leih ang mai hian chiang em emin ka harh hlawl mai a (Hetia ka aom lai hi Singapore-ah ka damna tura darkar 4 lai țawngțai rualna hun an hman lai a ni tih ka khawchhak țhianin a hnuah min hrilh nghhe nghe a), ka ril han țamzia mai chu..! Ka țamchhawol ni berin ka hria. Ka taksaah chuan na reng reng a aom tawh lo va, vawm bo ang der zu nia!

Pathian hnenah thihna kotlang ata min la chhuaka min tihdam tak avangin lawm thu sawiin ka țawngțai nghal a; tichuan, dam pangngai reng ni aom takin tui ti em emin chaw ka ei ta a; bawngsa duh mi ka nih avangin a tui ka ti teh asin. Chuta țang chuan ei leh inah te, pum-pai thu-ah eng mah harsatna ka nei zui ta lo.

Thil ka ei loh rei avangin ka pum pui a lo te ta zawok a, ka duh angin ka ei tam thei lo zawok mai pawh a. Ka taksa leh thlarau min tidamtu Isua Krista hnenah lawm thu ka sawi bang thei lo a ni.

Ka cancer a dam hnua ka rih chhoh chak dan chu hetiang hi a ni a:

Kum 1997-a cancer ka nih ka inhriat hmam kg. 90 ka ni a.

Kum 1998 March 27-ah kg. 57

Kum 1998 April 4-ah kg. 60

Kum 1998 April 28-ah kg. 64

Kum 1998 Nov. 22 (tun dinhmun a ni)-ah kg. 76

Kum 1998 April thlaah ka doctor rawn khan min check leh a, ka taksaah chuan cancer hnuhma reng reng a hmu tawh lo. Kei chuan Dr. Isua Krista'n min tihdam tak thu ka hrilh a, ani chuan a koki a san ak ringawot a.

A tawpa bera ka han sawi duh chu Isua Krista-ah kan innghat pumhlum a nih phawot chuan eng mah lungngaihna tur leh hlauh tur a aom lo tih hi a ni. Thi tura ka inbuatsaih ruk lai khan ka chhungte ka thlahlel a, ka mangang barok si a; chuwangin, anmahni kalsan mai tura ka innghai changin vawi tam tak ka țap ru țhin a ni. Mahse, Pathian hi engkim aia ropui zawok a ni a, a tan 'theih loh' a aom loh avangin hun a tihah a che mai țhin a ni.

Engkimin a thu a awih țhin si a.

— A true story by Donald G Heding

November 22, 1998

www.mizoramynod.org

■ ■ ■ RIMAWI

PUAN VAR SINTE

—Upa Sanglianthanga,
Tlangnuam

Re hla hi kum 2007 khan Lalpa'n min pe a. Vanram ngaih hla hi ka la nei vak ngai lo va. He hla hi Thupuan 7:13-17 thu behchhan a ni. He khawvelah hian Lal Isua ringtute chu harsatna leh hrehawmnaten min chimbuai thin a; Lungngaihna avangin kan mittuite ta thin mah sela, he lei ram mi hi kan ni ve tawh lo va, kan ram hlun tur Lalram ropui vanram kan thlen hunah chuan kan mittui te chu Lalpa'n min hruk hulsak ve tawh ang a. Chumi hun ropui chu ringtute hian kan nghahhleleh leh beisei ber ni se tih hi he hla ka phuahna chhan ber chu a ni e.

Chang khatnaah hian ringtute tan chuan he khawvel ropuina leh mawina te, hausakna te hi hluin ropui viau mah sela, he lei ropuina leh mawina te aia ropui leh nasa zawk van lawmna Lal Isua zarah kan nei tawh a; lei ropuina te hi chuan kan nunah awmzia a nei thei tawh lo a ni. Lei dana lawmna nei tawh lo

te hi chuan Lal ram ropui thlen hun an nghakhleh thin.

A thunawnah hian Thupuan 7:13 thua Johana tawngkam hmangin phuah a ni a, heng thu hian ka lung a tileng em em a, ka'n mitthla a: Johana Patmos thliarkar hmun fianrial leh khawharthlak tak maiah a hmangaih Lalpa Isua avangin lung inah a tang a. Nungdamin chu hmun chu chhuahsan leh a inring tawh lo a ni ang.

Chang hnihnaah hian ka mit ata Lalpa'n ka mittui te min hruk hulsak hunah chuan "Nunna thing" Eden huana awm, Genesis-a kan hmuh, bawhchhiatna avanga seraf leh mei khandaih vir tawn zawk zawkin a a ven tlat chungah ngei chuan thu kan neiin kan duh duhin Nunna thing rah chu kan ei thei tawh dawn a ni tih Lalpa'n min hriat fiahtirna a ni.

A dawt leh chang thumnaah hian he ka lei in 'taksa' hi a ral huna chuan Thlarau in 'Lalpa' hnen kan la thleng ve ang; he leia kan lungngaihna leh kan hrehawmna thu te chu Lalpa Isua hnenah hrill vein, anin min lo lawm ve tawh dawn a ni. Lalpa chu fakin awm rawh se!

A tawp berah hian kan chenna lei hi hrehawm hle mah se, he lei ram mi kan ni ve tawh lo va, kan Lal Isua thisena tlan te leh ama ruala kaihthawh te kan nih avangin Adama thlah he lei anchhedawng mi te kan ni ve tawh lo va, chuvang chuan kan ram hlun tur chen hlena tur ram ropui zawk chu ngaiin Lalpa mite chu he leiah hian kan rum vawng vawng thin.

Johana kha a hun hnuhnung lama khawhar taka a awm laiin Lal Isua a hnenah a lo inlar a. A hnenah thu tam tak wawiin thlenga thuchah pawimawh te arawn puang a.

Tin, chung hnuah chuan mipui tam tak, tu ma chhiar sen rual lohte, hnam tin chi tin leh jawng tinreng te, puan var sina, tumkau te kengin

Beramno hmaah dingin Lalpa chu ropui takin an chawimawi a. Upa zinga pakhat chuan, "Heng mite hi tute nge an nih, khawi atanga lo kal nge an nih?" tiin a zawt a, Johana chuan, "Ka pu, nangman i hria alawm," tiin a chhang a. Upa chuan chung puan var ropui sintute chu khawvela an dam lai huna an Lalpa Isua Krista tana hrehawm tam tak tuartu an nih thu leh an puan te pawh Pathian Beramno Lal Isua thisena suk fai a nih thu a hrilh a.

Vawiina keini Krista rawngbawltu Kristian thalai pawlte pawh hian Lal Isua avanga hrehawm tam tak kan tuarna te hi, vanramah puan var ropui min sintirtu tur an ni tih te kan hriat thar zel theih nan he hla hi Lapan malsawm zel rawh se. Amen!



*Pu chuan a thuneihna hmangin a hote a khalh kal a;
hruaitu erawh chuan a chawok phur.*

*Pu chu thuneihnaah a innghat a; hruaitu erawh chu
thawh hona leh inlungualnaah.*


*Pu chuan a hote thinsungah hlauhthawwna chi a tuh a; hruaitu erawh chuan
hmangaihna a pe chhuak.*

Pu chuan 'Ka' a ti a; hruaitu erawh chu 'Kan' a ti thin.

*Pu chuan tu nge dik lo tih a chhui chhuak a; hruaitu erawh chuan
eng nge dik lo tih a zawng zawk thin.*

*Pu chuan zawh thuai dan a hria a; hruaitu erawh chuan
engtia tih tur nge tih a hre thung.*

Pu chuan zahawmna a phut a; hruaitu erawh chuan zahawmna a vawng thin.



KANTU

Ramhlun Vengchung Br.

RAMHLUN VENGCHUNG BRANCH

Ramhlun Vengchung Branch KṚP hi Ramhlun Pastor Biala Branch pathum zinga a te ber leh naupang ber an ni a, Dt. 3.1.2011-a din a ni. Kum 2014-ah hian member 228 (Mipa - 136 Hmeichhia - 92) an awm mek a, group 3-ah inṥhenin Sadraka, Mesaka leh Abednegoa-ah te an inṥhen a. Branch hnuaiiah hian Sub-committee 6 siam a ni a, chungte chu - Programme, Evangelism, Sound & Instruments, Refreshment, Property & Documentation leh Perazim Editorial Board.

Sum tuak dan tlangpuite - faith promise, blanket suk, Jumble sale, sangha zawrh, rawra leh balu thiar, hmunphiah zawrh, paper chhe hralh, pickle siam leh group budget te an ni. Kristian Ṥhalai copy 88 lak a ni a, Branch din tirh aṥangan Pathianni apianga chhuak PERAZIM chanchinbu chu chhuah chhonzawm zel a ni. Kum 2013 chung khan member 4-in Biak In hawngin nupui/pasal an nei

a, hmun dang a innei an awm lo. Thawṥṥanni zan inkhawm percentage hi 32.78% a ni a, kohhran kaltlangin missionary 3 an chawm mek a ni.

Kum 2014 Branch budget chu Rs. 3,50,500 a ni a, Branch bungrua tihchangtlun nan hma lak mek zel a ni. Kohhran Zaipawl ṥha takin kalpui ve zel a ni a, kohhran ni pawimawh apiangah hla an rem ṥhin. Evangelism Sub Committee hma-laknain thla tin Pathianni hnukung ber tlaiah member hla te pualin chaw nghei ṥawngṥai an nei ṥhin. Central leh Bial KṚP aṥanga tih tur leh programme te an tihlawtling zel ṥhin a ni. Branch din tirh aṥanga a wawi khatna atan 2014 hian Ramhlun Pastor Bial Conference an thleng a ni.

Branch tichak tura din Group 3-te hi sum leh pai thawh chhuahna kawngah leh chet velna kawng hrang hrangah an ṥangkaiin Branch chakna hnar an ni. Member-te thawh hona a ṥha a, hlim takin rawng an bawl tlang ṥhin. ♦

Keimahni



■ January 10-12, 2014 khan Sihfa Branch Diamond Jubilee lawmna hmanpuiin Leader Rev. Lalrinmawia leh Com. member Dr. Lalliansanga te Sihfa-ah an kal a, Kulikawon Bial Zaipawl-in an țawiaawm. Jan. 11 (Inrinni) zanah Dr. Lalliansangan greetings a sawi a, Jan. 12 (Pathianni) chawhma inkhawmah Leader-in thuchah a sawi.

■ January 9 -10, 2014 khan Department of Psychology (Mizoram University), Mental Health Hospital & Medical Education Health & Family Welfare Department, Govt. of Mizoram leh MSACS te țangkawp buatsaih Two Day International Workshop on Mental Health Problems (Special Focus on Substance Use Disorder), Aijal Club-ah neih a ni a, Central KĲP ațanga aiawh tel tura min ngen angin T.Upa Dr. H. Lalthanzara a tel.

■ **BRANCH DING THAR:** November 9, 2013-ah Kawrthah Pastor Bial chhungah KĲP, Kawrthah South Branch a din thar a. Member mipa 109, hmeichhia 65, Total member 174 an ni. Registration Fee Rs. 50 an pe nghal bawk.

■ **CONDUCTORS' TRAINING:** January 6-9, 2014 chhung khan Aizawl khawpui chhung Bial Zaipawl Conductors' Training Synod Conference Centre-ah buatsaih a ni a. Training min neihpui tur hian Presbyterian Church of Wales (PCW) ațangin Choirmaster Eilir Owen Graffiths a lo kal. Training hi January 6, 2014 zan dar 6:30 khan CKĲP Leader, Rev. Lalrinmawian a hawng a. Training-ah hian conductors riak lut mi 21 an ni a, Pastor Bial Zaipawl 14-in he training hi an chhim.

Hun hman dan tlangpui: Zing dar 6:30-ah țanin Conductor-te training pek an ni a, he huna an zir hi zan lamah Bial Zaipawlte hmaah practical-a tih țhin a ni. Heng bakah hian Bial Zaipawl training-a telte hnenah kan Trainer hian Zaipawl tana țangkai tur thil chi hrang hrang a zirtir țhin. Conductor leh Bial Zaipawl lo kalten an hlawkpui hle.

Mizoram Synod Choir te January 9 zanah riak lutin January 10 (Zirtawpni) nilengin hun hman a ni a. Trainer, Eilir Owen Griffiths

hovin Zaipawl tana țangkai tur thil chi hrang hrang zir a ni a. Heng bakah hian hla chi thum (3) zir a ni. He Training hi January 10 zan dar 6:30 khan kharna hun hman a ni. Rev. Lalzuithanga, Sr. Executive Secretary-in kharna hun a hmang. Resource person Eilir Owen Griffiths hi Rev. Aneurin Owen @Zolawma'n a rawn kalpui a, January 4-ah Aizawl lo thlengin January 13-ah an haw leh a ni.

Training min rawn neihpuitute hi an an cham chhungin Aizawl khawpui leh Synod hmunhma hrang hrangte tlawhpui an ni a, hei bakah hian Kohhran hrang hrangah inkhawmpui an ni bawk a ni.

■ **HRUAITU INTHLAK:** Synod Inkhawmpui 2013 Rorelah Synod Executive Secretary-te siam rem a ni a, Executive Secretary i/c KŦP Rev. Lalzuithanga chu Senior Executive Secretary atan thlan a ni a, Executive Secretary i/c KŦP thar atan Rev. P.C. Pachhunga ruat a ni. January 6, 2014 khan Executive Secretary-te hian mawhphurhna (charge) an inhlan a ni.

■ Nl. Saidingpuii Sailo, Bethlehem, Synod Choir member chu Pathian kohna chhangin Synod Mission Board hnuaiah missionary atan a inpe a, Hetianga kan Synod Choir member rawngbawla a kal tur hi kan ui rualin a hlu kan ti a, a kalna turah duhsakna kan hlan a, i țawngțaisak zel ang u.

■ **SYNOD CHOIR RAWNGBAWLNA:**

1. **Tlangnuam Kohhran:** November 30, 2013 (Sun) zan khan Tlangnuam Kohhran Centenary lawm kharnaah an zai a, țum 2 dinah hla 4 an rem.

2. **Synod Conference Centre:** December 2, 2013 (Thawhțan) zan khan Synod Social Front programme - Alluminium Mistiri Training kharna inkhawm, Pi Zaii Hall (Synod Conference Centre)-ah an zai a, țum 2 dinah hla 2 an rem. Synod Social Front partner Aluminium Metal Alloys (Guwahati) chuan Synod Choir te zai lawm thu sawi nan Rs. 11,000 a hlan.

3. **Ramhlun North Kohhran:** December 3 & 8, 2013 (Thawhle & Pathianni) zanah Synod Inkhawmpui vawi 90-na, Ramhlun North Kohhran Biak Inah an zai a, hla 1 ve ve an rem.

4. **Mission Vengthlang Kohhran:** January 5, 2014 (Pathianni) chawhnu-ah Synod Mission Board missionary tih chhuah inkhawm, Mission Vengthlang Kohhran Biak Inah an zai a, hla 1 an rem.

5. **Synod Conference Centre:** January 6, 2014 (Thawhțan) zanah CKŦP buatsaih Conductors' Training Hawwna, Synod Conference Centre-ah hla 1 an rem.

6. **Saron Veng Kohhran:** January 7, 2014 (*Thawhlelni*) *chawhnu-ah Synod Choir member Rinhmingsangi pasal neih inkhawm, Saron Veng Kohhran Biak Inah hla 1 an rem.*

2014 General Conference Hla Bu tihdikna

KTP General Conference Hla Bu 2014 thuhmahruaia ziaak ang hian tihsual palha ngaihdam dil a ngai reng mai hi mihringte min timihringtu ni mah se inthlahrunawm tak a ni. Heng a hnuuia mite hi a langsar zual an ni a, a dang pawh a awm mai thei e, remchang angin kan siam tha zel dawn nia.

1. Phek keu hmasak bera Speakers tiha a hmasa ber Rev. Lalrinmawia tih hi *Rev. H. Lalrinmawia* tih tur a ni.
2. Phek 'iv'-naa Thil tumte pakhatnaah hian '*Thalaite*' tih hmaih palh a ni.
3. Phek 'viii' - Theme Song-ah hian Hlawm khatna 'eng rawh' tih hnuuia 's' hniam a bass part-a mi hi thaichhiat tur. 'thleng a' tih zawna tenor part hi 's' tur a ni a; tin, *pause* tur a ni bawk. Hlawm nganaa 'chungah a lo eng a'-ah hian *pause* tur a ni a, 'an zain' tih tenor part hi *mf*-a thlak tur a ni e.
4. Number 4-na 'Ka tling si lo Lalpa' tihah hian Thunawn tlar hmasa ber Bass part bawk chhut sual leh a ni e. Hetiang tur hi a ni –
d .i .d | f i , f i . - , f i : - . , f i / s i . s i : - , s i . - s i | l i : - , l i / d . d , d : , d
5. Number 9-na 'Khawvel hrehawm i tan' tlar hmasa ber Soprano 'kawng' tih 'r' hi 'm' tur a ni.
6. Number 21-na 'Inkhawmpui tiak tawh ngai lohna' tlar thumnaa 'hunin' tih hi 'hunah' tih tur a ni.
7. Number 26-na hlawm thumna 'i rawngbawlin kan ding' tihah hian *thluk (pause)* a paw lo.
8. Number 30-na thupui 'He khawvela kan **cham** chhungin' tih hi '*awm*' a thlak tur a ni a, he hla Harmonize-tu hi Upa Zothanmawia, Khatla Kohhrana mi a ni.
9. Number 31-naah hian a thunawna Bass leh Tenor part-ah hian Hla taka ram mawi, ram eng mawi-ah *chuan* tih tur a ni a, *tenor-ah fm* leh *Bass part-ah s d* leh *colon leh bar te* belh tur a ni.
10. Number 48-na 'Chawl lova fak che ka duh' tih hla Solfa hlawm (tlar) thumnaah - Chang khatnaa 'tu dang' tih hi '*thil dang*' tih tur a ni a; tin, chang thumna 'Lallukhum khum' ni lovin '*Lallukhum dawng*' tih tur a ni e.

11. Hla Number 49-na tlar hnihnaah ‘Thlipui hlahawm chuan a nuai a’ tihah hian ‘a *rawn* nuai a’ (.d) tih tur a ni a, tlar ngana ‘rawh’ tih *hi* ‘rawn’ tih tur. Phek 91 naah ‘Muanna thleng tur chu’ tih hi ‘Muanna *lo*’ tih tur a ni a, a solfa hi :- .d |r .m tih zawk tur a ni.
12. No. 45-naah fakna hla Lalpa min pèk, "An thlang zawk" tih phuathu C.V.L. Chhanhima hi South Sabual khua, tûna Chanmari, Aizawla chêng mek a ni.
13. Phek 100-na programme tar lanah A hmun: Zuchhip Field tih kha Field No. 1, Khawzawl tih tur a ni a, A hun: February 27 - March 2, 2014 tih zawk tur a ni bawk.
13. Phek 102-na Multiplex Programme Group II Thupui Sawitu: Pu V.L. Muanchhana tih tawh tur a ni. Tin, Group IV, A Hmun: Zaingena YMA Hall tih kha Zaingen YMA Hall tih tur a ni bawk.
14. Phek 103-na Pathian Biak Inkhawm, 1:30 p.m. Zaipawl zingah Zamuang Bial Zaipawl ten an remchan dawn loh thu an rawn thlen.
15. Phek 104-na Inkhawm ban Fellowship Items-ah Lemchan Tawi: Champhai Bethel Bial tih kha Champhai Vengsang Bial tih zawk tur a ni.



KṚP MEMBER INCHHIARNA KAIHHRUAINA


KṚP Member hi kum khat chhung atan chauh a ni a, member ni lai hmun danga insawnten an awmna hmunah KṚP bela, member-a an inpe leh th̄in hi thil lawmawm tak a ni a; a nachang hre zel tur pawha infuih zel chi a ni e. Amaherawhchu, inchhiarna lamah chhiar nawn theih an nih avangin inchhiarna atan hetiang hian kaihhruaina siam a ni –

1. KṚP Member zat chhiarna atan hian kum tin January 31 hi hman ni se. Hemi hnu lama kiam/pun theih a ni a, kum kal lai member zat chhiarna atan chuan January 31 china record kha rin mai tur a ni.
2. Branch pakhat aia tama member ni kawpin nupui pasal a neihin, nupui/pasal nei zat chhiarnaah chuan nupui/pasal a neih laia a awmna Branch-in chhiar mai se. Hei hian inlawmpui lam kharwih lovin, Branch pakhat aia tamin an lawmpui pawhin a lawmawma ngaih mai tur a ni.
3. Branch pakhat aia tama member ni kawpin thihna lo tawok se, member thi zat chhiarnaah chuan a ruang nghahna hmun zawok Branch-in chhiar mai tur a ni ang.

(Hei hi kum 2007-a tihchhuah tawh kha a ni a, kan han chhuah leh a ni e.)



Kantu: Ramhlun Vengchung Branch



Postal Regn. no. MZR/81/2012-2014
RNI No. MIZMIZ/2009/29074



Sihfa Branch Diamond Jubilee lawma hmanpuia kal Leader Rev. Lalrinmawia leh Kulikawn Bial Zaipawite



Itanagar khawpuiah Krismas hmanpuia kal Bethlehem Branch KTP te